

Vajtswv hais tias, thaum txog tiam kawg kuv yuav ua li no. Kuv yuav pub kuv tus ntsujplig rau txhua leej neeg. Nej tej tub, tej ntxhais yuav qhia kuv tej lus, nej tej tub hluas yuav ua yogtoog, thiab tej neeg laus yuav ua npausuav pom tej uas yuav muaj los.

Tsis yog li ntawd xwb, thaum txog tiam ntawd kuv yuav pub kuv tus ntsujplig rau kuv cov tubqhe, tsis hais pojniam txivneej huv tibi lawv yuav qhia kuv tej lus" (Cov tubtxib 2:1-8,14-18)

377

RAU SIAB UA VAJTSWV HAUJLWM

Yog li ntawd cov kwvtij uas kuv hlub es, nej yuav tsum muab siab rau ntseeg tiag tiag, tsis txhob ua neeg ywjfab ywjfwj. Nej yuav tsum niajnub rau siab ntso ua tus Tswv txoj haujlwm, rau qhov nej twb paub lawm hais tias, tej haujlwm uas nej ua ntawd puavleej muaj nujnqi huv tibi. (I Kaulithaus 15:58)

Txawm yog peb tseem nyob hauv no lossis mus nyob saud los, peb xav ua raws li Vajtswv lub siab nyiam xwb. (II Kaulithaus 5:9)

...Peb nco ntsoov hais tias, nej yog cov uas muab siab rau ntseeg. Thaum peb thov Vajtswv tus uas yog peb Leejtxiv peb nco ntsoov hais tias, nej tsis yog cov uas tsuas hais ntawm lub ncauj hais tias, nej yog cov ntseeg xwb, tiamsis nej yeej ua haujlwm rau sawvdaws pom thiab. Nej zoo siab hlo pab lwm tus, txawm yog nej yuav ua haujlwm khwv npaum li cas los, nej yeej tsis khuvxim nej lub dag lub zog hlo li, thiab nej cia siab ntsoov rau peb tus Tswv Yexus Khetos. (I Thexalaunikes 1:3)

Yexus Khetos tus uas muaj lub siab hlub nws kav tagnrho peb lub neej huv tibi rau qhov peb pom hais tias, muaj ib tug tuag theej sawvdaws lub txhoj. Lo lus ntawd qhia hais tias, sawvdaws puavleej koom nws txojkev tuag.

Nws tuag theej txhua tus lub txhoj. Nws ua li ntawd kom cov neeg uas tseem ua neej nyob, lawv tsis txhob ua lawv lub neej raws li lawv lub siab nyiam, tiamsis kom lawv ua lawv lub neej raws li nws lub siab nyiam. Nws yog tus tuag thiab yog tus Vajtswv tsa sawv hauv qhovtuag rov qab los. Nws ua li ntawd twb yog vim nws hlub lawv.

Yog li ntawd peb thiaj yog cov sawv Yexus Khetos cev qhia nws tej lus rau nej, piv ib yam li Vajtswv qiv peb qhovncauj ntuas nej. Yexus Khetos kom peb ntuas nej hais tias, nej yuav tsum cia Vajtswv coj nej cov uas yog yeebncuab los nrog Vajtswv ua phoojywg. (II Kaulithaus 5:14,15,20)

Tus cog thiab tus ywg dej tes haujlwm zoo ib yam nkaus tsis txawv qhovtwg li. Vajtswv yeej yuav muab nqi zog kom tsimnyog nkawv lub dag lub zog rau nkawv.

Rau qhov peb puavleej koom ua Vajtswv txoj haujlwm. Nej yog Vajtswv thaj teb.

Thiab nej yog Vajtswv lub tsev. Vajtswv pub Tswvyim rau kuv, kuv zoo li ib tug kws txawj txawj ua tsev. Kuv tsa ncej tsa nqaj cia, lwm tus tuaj vov thiab tuaj xov rau, tiamsis txhua tus uas tuaj ua nyias yuav tsum ua tib zoo ua nyias zoo zoo.